

Dithero tsa Tirelano mo Kutlwanong

26/2015 Thero ka Sontaga o o bidiwang Kantate, e le ka 03. 05. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Pesalome 98:1a, le re: **“Opelelang MORENA sefela se sešwa; gonne o diriele tse di kgakgamatsang.”**

1. Sefela sa 183 - 169/-

2. Thapelo: Rara yo o mo legodimong, re tumisa leina la gago, re opela dipesalome tse dintle le kajeno, ka o le Modimo o o re ratang. Re kopa Mowa o o Boitshepo gore o re rute ka Lefoko la gago gore re go opelele jaaka bana ba gago, re kgone go opela ka difela tse di go kgatlang. Re kopa jalo ka Jesu Keresete, Morena wa rona. Amen.

3. Lefoko la Testamente e kgologolo le kwadilwe mo go Jesaya 12:1-6;

Epistolo ka fa thulaganyong ya 2 e kwadilwe mo go Bakolose 3:12-17;

Efangele ka fa thulaganyong ya 3 e kwadilwe mo go Matheo 21:14-22.

4. A go ipolelwe tumelo ya bokeresete!

5. Sefela sa 254 - 236/245

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Matheo 11:25-30, e re: "Ka nako eo Jesu a bua a re: 'Ke a go boka, Rara, Morena wa legodimo le lefatshe, ka o fitlhetse ba ba botlhale le ba ba tlhaloganyang dilo tse, mme o di senoletse ba ba se nang maitemogelo. Ee, Rara; gonne e ne e le kgatlhego ya gago gore go nne jalo. Tsotlhe ke di neilwe ke Rre; ga go ope yo o itseng Morwa, fa e se Rara; le gona ga go ope yo o itseng Rara, fa e se Morwa, le yo Morwa o ratang go mo mo senolela. Tlaang kwano go nna lotlhe ba lo lapileng, ba lo imelwang; nna ke tla lo lapolosa. Ipeleseng jokwe ya me, lo ithute mo go nna; gonne ke bonolo le boikokobetso mo pelong, mme lo tla bonela mewa ya lona tapologo. Gonne jokwe ya me e bonolo, morwalo wa me o botlhofo.'" Amen.

8. Thero: Barategi mo Moreneng wa rona Jesu Keresete, pele re ise re utlwe Lefoko la thero ya kajeno, a re utlweng temana le mafoko a mangwe a kajeno, ke raya Lefoko la Testamente e kgologolo, temana ya beke, le Epistola ya Sontaga wa kajeno gore re bone sentle gore Sontaga ono ke Sontaga wa difela, wa go opela, le go opelela Modimo difela tse dintle tsa pako, dipesalome, dikopelo tsa mowa, le diduduetso. Leina la Sontaga le re: Kantate, ke gore opelang! Temana ya beke e ntshitswe mo Pesalomeng ya kajeno, e le ya 98, e re: “Opelelang MORENA sefela se sešwa; gonne o dirile dilo tse di kgakgamatsang!” Ka temana eo ya beke re bona gore re tshwanetse go opelela Modimo wa rona difela tse dintle, difela tse di boitshepo. Badumedi ba a opela, ba opelelela Modimo wa bone, gonne ba itse ditiro tse dikgolo tsa ona, bogolo tiro ya go re golola mo losong lo lo sa khutleng ka go re romela Morwaaona mo lefatsheng gore a re pholose.

Lefoko la Testamente e kgololo ke sefela se se lebogelang go pholosiwa ga Baiseraele, sefela se se re: “MORENA, ke a go leboga! Gonne o ne o le bogale mo go nna, mme bogale jwa gago bo boile, o bile wa nkgomotsa. Bonang, Modimo ke pholoso ya me. Ke tla o ikanya, ke sa boife sepe. Gonne Modimo MORENA ke thata ya me le sefela sa me, o bile o diregile pholoso ya me.” Se a tswela, se re: “Lebogang MORENA, bitsang leina la gagwe, itsiseng ditiro tsa gagwe mo merafeng, utlwatsang gore leina la gagwe ke le legolo. Opelelang MORENA, gonne o dirile dilo tsa bonatla; a go itsiwe jalo mo lefatsheng lotlhe! Ipeleng, lo duduetse, lona baagi ba Sione! Gonne Moitshepi wa Iseraele o mogolo mo gare ga lona.” Tota leboga MORENA, phuthego ya gagwe, gonne MORENA o molemo, o na le bopelotlhomogi mo go rona. Ga a re direle ka fa re go tshwanetseng, mme o na le boitshwarelo jwa bopelotlhomogi le rona.

Mo Epistoleng ya kajeno re bona Lefoko le le reng: “Lo kgothatsanye ka dipesalome le difela tsa pako le dikopelo tsa mowa, lo opelele Modimo ka tebogo mo dipelong tsa lona!” Ka mafoko ao re bona sentle gore batho ba Modimo ba a o opelelela, le go duduetse. Tseo ga di a simologa ka rona, mme ke sa batho ba dipaka tsotlhe. Le mo tirelong-Modimo ka Sontaga phuthego e tlaetse go opela. Gape e tshwanetse go opela. Ka Sontaga re opela difela tsa bogologolo, dipesalome tsa Beibele, jaaka introitu, sefela sa go tsena mo tirelong, le tumiso ya ga Simeone, re opela difela tsa bogologolo jaaka tse di kwadilweng ke Martin Luther. Re opela difela tse dintšhwa, jaaka

dikhorese. Badumedi botlhe ba a opela. Ka dinyaga tsotlhe tse di fetileng badumedi ba opeletse Modimo difela tsa bone. Difela tse di kgatlang Modimo di o galaletsa le Morwaaona. Ga di opele ka ga bontle jwa batho, mme ka ga bontle jwa Modimo, ka bopelotlhomogi jwa ona, ka ga tiro ya ona wa go re pholosa, le ka tsa go tlhola le go boloka tlholego ya ona. A re o a lebogeng go ya bosakhutleng!

Lefoko la thero ya kajeno le bua ka ga Jesu Keresete, fa a galaeditse Rraagwe, Mong-wa-thata-yotlhe, Motlhodi wa legodimo le lefatshe. Jesu Keresete o leboga Rraagwe, ka a ne a sa kgethe tsela e e tshwanang le ditsela tsa batho, mme o kgethile tsela ya go senolela ba ba se nang maitemogelo boammaaruri jwa ona. Modimo ga se motho. Boammaaruri jwa ona ga bo tshwane le boammaaruri jwa batho. Tlhaloganyo ya ona ga e tshwane le tlhaloganyo ya batho. Lefoko leo le re gopotsa lefoko le le kwadilweng mo Lokwalong lwa ga Paulo go Bakorinthe kwa a kwalang teng a re: "Gonne se se kaiwang bosilo jwa Modimo ke botlhale jo bo gaisang jwa batho; le se se kaiwang bokoa jwa Modimo ke thata e e fetang ya batho." Tsela ya boikokobetso jo Jesu Keresete a ikamogileng ka jona ga e tshwane le go itshwara ga batho. Batho ba rata thata, ba rata botlhale, ba rata go bonala fa pele ga ba bangwe. Modimo o pholosa baleofi ka go ikokobetsa, ga se ka tsela e e phatsimang mo matlhong a batho, le e seng go bonala fa pele ga bagolo ba lefatshe. Mo go moporofeti Jesaya re buisa Lefoko le le reng: "Mme ruri ene o rwele malwetse a rona, a sikara matlhoko a rona; mme rona ra itlhome, fa a bediwa, a itewa ke Modimo, a bogisiwa. Mme ene o pholeditswe ka ntlha ya maleo a rona, a teketelwa melato ya rona. Petso ya mo wela gore rona re bone kagiso. Mme re fodisitswe ka dintho tsa gagwe." Batho ga ba tlhaloganye thata le ditsela tsa Modimo ka tlhaloganyo le thata ya tlhago ya bone. Ba ithuta, le go ruta tse dintsi mo dikolong, fa ba ithuta sentle, le go itse tse dintsi, ba ka kgona sentle mo yunibesiting, ba ka tlholaganya tse dintsi malebana le dinaledi, le popego ya loapi le lefatshe, mme go dumela le go bona ditsela le mekgwa ya Modimo, go dumela mo Modimong, o e leng Rara le Morwa le Mowa o o Boitsheopo, ga ba kgone go go ithuta, le e seng go go dira, le e seng go go tlholaganya ntle le Mowa o o Boitshepo. Ke Mowa o o Boitshepo o o tshwanetseng go re bitsa, le go sedimosa, go re itshepisa, le go re boloka gore re dumele mo Modimong o o Borarobongwe. Tumelo ya rona ga e tswe mo tlhaloganyong, gongwe mo botlhaleng jwa rona, mme ke neo e e tswang mo Modimong wa rona.

Go ne go le molemo mo Modimong gore go nne jalo. Modimo ga o rate gore re age tumelo ya rona mo godimo ga botlhale jwa rona. Tumelo ya nnete e tswa mo Modimong. Mowa o o Boitshepo o dira tumelo mo dipelong tsa rona gore re dumele mo go ona. Modimo ga o rate gore re age pholoso ya rona mo godimo ga thata ya tlhaloganyo ya rona. Ka bopelotlhomogi jwa ona re pholosiwa. Ka bopelotlhomogi jwa ona re dumela mo Modimong o o Borarobongwe. A re ithuteng go aba, le go baya boikanyo jotlhe jwa rona mo Modimong le mo bopelotlhomogi jwa ona. Re se leke go aga mo tlhaloganyong ya rona, gongwe mo botlhaleng jwa batho, mme re ikanye Modimo o o rometseng Morwaaona mo lefatsheng gore re se ka ra latlhega, mme re nne le botshelo le pholoso ka bopelotlhomogi jo bogolo jwa ona.

A re se ka ra thiba ditsebe tsa rona kajeno, mme di kabologe sentle, re reetse sentle, re utlwe Mopholosi wa batho. O a re laletsa, a re: "Tlaang kwano go nna lotlhe ba lo lapileng, ba lo imelwang; nna ke tla lo lapolosa. Ipeleseng jokwe ya me, lo ithute mo go nna; gonne ke bonolo le boikokobetso mo pelong, mme lo tla bonela mewa ya lona tapologo. Gonne jokwe ya me e bonolo, morwalo wa me o botlhofo." A re reetseng Jesu, re utlwe taletso ya Modimo wa rona. Jesu o re laletsa gore re atamele mo go ene. Ga a rate go re rwesa merwalo e e bokete. Ga a rate go re rwesa merwalo e e bosula. O re solofetsa bopelotlhomogi, kagiso, le tapologo, o re abela boitumelo, botshelo le lorato. A re ithuteng mo go ene, e seng mo bathong ba lefatshe gore le rona re nne le kutlwelobotlhoko, re nne le kagiso, re nne le boitumelo jo bo itumedisang ba bangwe, le rona. Re tswe mo molaong wa lefatshe wa kilano, mo molaong wa lefatshe wa mafufegelo, molao wa lefatshe wa go bolaelana, re ithute mo go Jesu Keresete go itshwarela, le go rata, le go rwadisanya merwalo, le go re amogelana ka kagiso.

Jesu Keresete o re ruta kajeno ka se sengwe. Ga a rute jaaka batho ba lefatshe, gonne ke Mopholosi wa rona. O re bolelela gore ga re ka ke ra bona boitshwarelo le boikhutso mo go ope o sele, fa e se mo go ene fela, le e seng ka tsela e nngwe, fa e se ka go amogela taletso ya gagwe, go lemoga gore jokwe ya gagwe e bonolo, morwalo wa gagwe o botlhofo. A re mo lebogeng go ya bosakhutleng. Re mo leboge ka difela, le diduuetso, le dipesalome. Ee, phuthago ya ga Jesu Keresete, itumele! Opela! Duduetsa, gonne go molemo go opelela Modimo difela tse di ntle, tse di boitshepo. Amen.

9. Thapelo: Morena, Modimo o o rategang, o o tlatsang dipelo tsa badumedi ba gago ka maikutlo a le mangwe fela, naya morafe wa gago gore o dire thato ya gago ka boitumelo, o go opelele ka pelo yotlhe ka dipesalome le ka difela, o femelwe mo sebakeng sa dipheretlhego tse dintsi tsa kajeno, o o amogele kwa maitumelo a nnete a a leng teng ka ene Jesu Keresete, Morena wa rona yo o tshelang, a busa mmogo le wena le Mowa o o Boitshepo jaanong, le ka bosakhutleng. Amen. Thapelo ya Morena: Rara wa rona yo o mo legodimong ...

10. Sefela sa 253 - 235/244

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi.
Amen.

Thero eno e kwadilwe ke P. C. Weber, ka ngwaga wa 2009.
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.